

四庫全書

子部

欽定四庫全書

子部
冊府元龜卷五十四至
七

詳校官中書臣瞿 照

員外郎臣牛稔文覆勘

總校官庶吉士臣何思鈞

校對官中書臣鮑之鍾

謄錄監生臣錢萬卷

欽定四庫全書

冊府元龜卷五十四

宋 王欽若等 撰

帝王部

尚黃老第二

唐玄宗天寶元年正月甲寅陳王府參軍田文秀上言
曰玄元皇帝降見於丹鳳門之通衢告錫靈符在尹喜
故宅帝遣使旁求於函谷故關令尹喜臺西一百三十
步發之而得時文武百官及宗子僧道咸上表以符瑞

感通韞匱真寶潛應年號先天不違願崇徽號光昭典
禮累表入帝固辭不受壬申乃下制曰神之降休禮無
不荅永言禋祀必在躬親朕粵自君臨載弘道教崇清
淨之化暢玄元之風庶乎澤及蒼生時臻壽域積以歲
月未嘗懈怠豈謂微誠感通烈祖降見乃昭靈命是襲
寶符因而求之應言而獲亦既至止果表殊徵諒惟祕
詞不可詳說然邦國大慶何以過焉是知神仙所緘造
化同固爰初有待經韞匱而多時潛應改元若符契之

相合景福攸介祇畏良深而羣官宗室抗疏於外元良諸子屢請於中逮夫緇黃兼彼耆老以至懇誠不已前後相仍願加天寶之名用易開元之號顧惟菲薄曷以當之然則玄元在乎欽承人心難以推拒順天從衆義協至公敬依所請實用多愧斯蓋上玄厚載爰及百神孚佑効靈協於睿祖幽贊惟新之歷克彰永代之祥宜遵記典式陳昭報以來月十五日祔玄元皇帝廟

二月乙酉置玄元皇帝廟辛卯親享玄元皇帝於新廟

京城斷屠宰是月詔史記古今人表立元皇帝升入上
聖

三月丙申追號莊子為南華真人所著書為南華真經
庚子帝曰莊子號曰南華真人其文列庚桑宜令中書
門下更討論聞奏宰臣李林甫等奏曰莊子既號南華
真人文子請號通玄真人列子號冲虛真人庚桑號洞
虛真人其數子并望隨號稱經從之門下侍郎陳希烈
奏曰臣伏見今年二十日恩制以莊子號南華真人書

曰南華真經然真經所說皆理身之要發明奧義有十萬玄言祖述道經含五千微旨昔常侍講跪演經文至於七篇陛下顧謂臣曰其篇有養生主已悟長年之術其次有德充符豈無非常之應臣稽首對曰陛下德充於內符應於外發言之後必有大慶以應之後篇之中所謂應帝王之篇是也今玄元皇帝果降靈符彰寶祚無疆之福含真人知來之旨尊以稱謂陳其象設希代之禮曠古未聞臣於此經宿願深重受持讀誦三十餘

年作禮焚香庶俾神化獲逢殊慶倍百常情特望宣付
史官以昭靈應許之

四月戊寅詔曰化之原者曰道道之用者為德其義至
大非聖人孰能章之昔有周季年代與道喪我烈祖玄
元皇帝乃發明妙本汲引生靈遂著玄經五千言用救
時弊義高象繫理貫希夷非百代之能傳豈六經之所
擬承前習業人等以其卷數非多列在小經之目微言
奧旨稱謂殊乖自今已後天下應舉除崇玄學士外自

餘所試道德經宜並停仍令所司更詳擇一小經代之
其道經為上經德為下經庶乎道尊德貴是崇是奉凡
在遐邇知朕意焉戊子命有司定玄元廟告享所奏樂
太常奏降神用混成之樂從之

六月制曰大道先於兩儀天地生於萬物是以聖哲之
後咸竭其誠今後應緣國家致命表疏簿書及所試制
策文章一事已上語指道教之詞及天地乾坤之字者
並一切半闕宜宣示中外

九月詔兩京玄元廟改為太上玄元廟天下准此

十月詔曰善利萬物莫先乎大道孚祐兆庶實賴於尊
經朕每念黎庶無忘惠養常冀盡登富壽之域永無凍
餒之虞所以去年具有處分令天下諸觀轉本際仙經
逮至今秋果聞有歲自非大聖昭應孰臻於此宜令天
下道士及女道士等待至今歲轉經訖各於當觀設齋
慶讚仍取來年正月一日至年終已來依前轉本際經
兼令講說其所設齋度慶亦宜准此庶使遠近蒙福如

朕意焉

二年正月追尊元皇帝為大聖祖元皇帝兩京崇
玄學改為崇玄館博士為學士助教為直學士更置大
學士員又義陽郡築元皇帝宮獲玉石真人獻之

三月親祠元皇帝廟追尊遠祖制曰庇生人者必崇
於大道受成命者實賴於前烈恭惟大聖祖元皇帝
道光太極首出混元弘敷妙門廣運真化雖乘時御氣既
超昇於上清而儲祉發祥每孚祐於來裔祚我寶運格

於皇天爰自創業迨於茲歲頻彰嘉貺屢覩真容使夫
天清地寧物阜人庶六氣時若四夷來王皆聖祖之感
也至道之應也成功不宰豈假於強名降福無疆敢忘
於昭報是用薦徽號增禮冊蠲潔以盡敬躬親以致誠
意旣昭格良深感慶宜因展事更廣揚名夫聖人之生
乃先天地應變無體其德猶龍雖冥冥之中初不知誰
之子而誕靈之後亦必有先聖祖父母著在圖諫母益
壽氏已崇徽號曰先天太后父周正御大夫敬追尊為

先天太皇仍於譙郡置廟自餘事已上准先天太后廟
例且聖祖所理本在諸天將欲降靈固宜取象况惟帝
號豈可名宮其玄元宮宜為太清宮西京改為太清宮
東京改為太微宮天下諸郡改為紫極宮兩京宮內道
士取先抽有道行者一七人自餘於新度人中簡擇取
添滿三七人為定額仍各賜近城莊園各一所並量賜
奴婢等其道士女道士先令司封檢校不須更隸宗正
寺所置崇玄署宜停古人制禮祭用質明義既取於尚

幽情實緣於既歿我聖祖湛然常在為道之宗既殊有
盡之期須展事生之禮自今已後每聖祖宮有昭告宜
改用卯時已前行禮朕深惟復撲將致無為常恐至理
難明玄風未暢不有時習焉能化成自今已後每至三
元日宜令崇玄館學士講道德南華等諸經羣公百辟
咸就觀禮庶使軒冕之士盡弘南郭之風寰海之內咸
為大庭之俗其崇玄館大學士宜賜物一百疋學士賜
六十疋直學士四十疋宮內先配住道士各二十疋宣

布中外令識朕懷

初太清宮成命工人於太白山采白石為玄元聖容與玄宗聖容侍立於

玄元右皆依王者衮冕之服繪綵珠玉為之

五月蘇州刺史鄭長裕奏新作玄元皇帝宮有九井自然羅列在宮院內差池階宇洞徹常盈汲用不竭宛合譙宮九井之數望宣付史館頒示天下從之

九月譙郡紫極宮宜准西京為太清宮先天太皇及太后廟亦並改為宮

三載三月兩京及天下諸郡於開元觀開元寺以金銅

鑄帝等身天尊及佛各一

四載正月甲子帝於內道場為兆庶祈福親撰黃素文
登壇其文騰空自飛上天空中有言曰聖壽延長丁卯
皇太子諸王上表賀曰今月六日伏見陛下昭告上帝
陰隲下民勤恤蒼生克成黃素况靈丹神合祕藥天成
聿修壇奉以行事肅恭展禮飛章騰踊而入雲虛空
有言聖壽靈長而象岳休祐靈感曠古未聞伏望宣示
朝廷錄付史館手詔報曰頃以獻歲親祠百靈豈精至

之上昭而禎祥之屢應神言報休徵之慶黃素飛雲漢之間皆宗社降靈福流寰宇豈予微感獨能致之所請宣示朝廷光於史冊者依

二月辛未中書門下奏曰臣等昨十二日因奏事親奉德音朕以正月甲子日為萬姓祈福初登壇時疾風甚勁及行事之際則恬然清謐又朕親撰黃素文置壇所案上竭誠陳請須臾騰空飛上空中忽聞有言報朕休徵論蒼生福慶及行禮事畢又風起如初朕近於嵩山

所鍊藥成其時亦置於壇側及夜左右方欲收藥又空中聞語諸靈官雖已赴大同殿其藥且未須收此自監守言聲甚厲其左右祇承及道士等聞者莫不驚悚以達曙之後乃收其藥朕為蒼生祈福有此殊應與卿等同慶者臣聞上天之載雖曰無聲聖人所感必將有應陛下精誠契道深仁被物親祈介福用濟羣生法事既陳疾風旋止聖詞上告祕錄騰飛遂降神言屢呈昭應始則孚祐下土報黥庶之和平終乃垂護靈丹表皇期

於萬億人聽所接神休莫踰希微之地屢有昌言感應之功不惟幽贊殊祥特異振古未聞諒天意之合符豈山聲之足比無疆之慶萬國同歡況在微臣實倍常品伏望編諸簡策宣示中外帝手詔報曰朕精修道源為人祈福雖則每多昭應若此之殊祥豈聖祖揆予之無私靈真貺我之誠感遂得休徵之應出自神言勤請之詞上飛空境永惟虛薄何以當茲然福建蒼生深為慰也所請者依

甲午崇玄館學士門下侍郎陳希烈奏曰伏見太清宮
道士蕭從一云今日五更欲於殿上焚香行至三清門
忽有一片紫雲從空下兼有異常音樂忽然如夢身心
驚駭見空中有異人兼仙童玉女謂從者曰我是玄元
皇帝可報吾孫汝是上界真人令侍吾左右吾冥使天
匠就助成就訖長衛護汝受命無疆災害自除天下安
樂言訖隨雲氣便入殿門謹案諸道士學生皆稱今日
凌晨於三清門外見道士蕭從一鞠躬唱喏三四聲有

紫雲及音樂移時不散伏惟陛下虔誠奉道福祐所歸
置玉石真容侍聖祖左右仙藥下慶天將助成紫雲徘徊
移時不散空中有語所報非常言聖壽之延長億萬
載之無極伏望宣付史官帝手詔報曰纘承丕業遵修
玄訓精誠之至冀在希夷寡昧之德寧期昭應恭惟聖
祖屢降真容仙衛接於雲間郊駕迴於天路又賜以無
疆之壽且欣以助成之言嚴奉神休良深祇慶所請者
依

四月癸巳詔曰尊祖奉先必在於崇敬辨儀正禮所貴於緣情伏以大聖祖玄元皇帝御氣升天長生久視體重玄而不測與元化以無窮真容屢見寶符仍集恭惟孚祐實表常存比太清宮行事官皆具冕服爰及奏樂未易舊名并告獻之時人陳筴祝旣非事生之禮皆是降生之儀且真俗殊倫幽明異數理有非便亦在從宜自今後每於太清宮行禮官宜改用朝服兼停祝版其告獻辭及所奏樂章朕當別自修撰仍令所司具儀注

文奏

七月丁巳蜀郡上言道士鄧紫虛投龍設醮於江潭有大蛇長一丈自潭遊出文采五色有異常蛇其上又有慶雲紛郁望編諸史冊從之乙卯詔曰王者天其祖學者父其師義有尊崇情歸孝敬况我玄宗道要無名象先猶龍莫測昔常問禮烹鮮有論歷代攸尊永惟重玄衆教之父者也朕纘承聖緒祇服玄言乙夜觀書將求於道雖理歸絕學信無取於筌蹄然垂代作程義必存

乎文字俾之大順亦合禮經其墳籍中有載元皇帝南華等真人猶稱舊號者並宜改正其餘編錄經義等書亦宜以道德經列諸經之首其南華經等不須編在子書仍即令集賢院審詳改定應舊號并科目訖具宣付所司仍頒示中外

五載正月太清宮使門下侍郎陳希烈奏昨日緣告獻大聖祖宿齋時日抱戴又今日告限後有紫雲從殿上起向東南飛光昭清宮色蓋仙宇久而不散

二月太清宮使門下侍郎陳希烈奏曰謹案高上本紀
大聖祖玄元皇帝以二月十五日降生既是吉辰即大
齋之日請同四月八日佛生日准令休假一日從之
十二月巴東郡興山縣之巴東公山有石自開其中有
石堂及天尊儀像幢蓋侍童皆自然具足

六載正月詔曰崇我祖訓其惟道門將以福助生靈弘
拯天下諸觀道士等如聞人數全少修行多闕其欠少
人處度滿七人並取三十以上灼然有道行經業者充

仍令所繇長官精加試練採訪重覆勿使踰濫度訖挾名奏聞其諸觀有絕無人處亦度三兩人准此簡試

七載三月詔曰朕刻意真經虔誠至道既憑玄祐永錫黔黎每朝禮三清則宵衣忘寢或齋戒一室則蔬食精專不以勤躬為儉務以徇物為心况於宰殺尤加惻隱自今已後每月十齋日不得輒有宰殺又聞閭閻之間例有私社皆殺生命以資宴集仁者之心有所不忍亦宜禁斷又詔曰朕每以道原有屬思竭精誠經教所在

豈忘崇奉且宗其道者師其人行其教者尊其禮晉瑯琊王公府舍人揚真人護軍長史許真人丹陽上計掾許真人皆道著妙門感通玄闕降高真之跡為上清之宗後漢張天師教達元和德宗太上正一之道幽贊生靈梁中散大夫貞白陶先生高尚塵表博達玄微綜緝真經俾傳後學並令有司審定子孫將有封植以嗣真也天師冊為太師貞白冊贈太保其天下有洞宮山各置壇祠宇每處度道士五人并取近山三十戶蠲免租

稅差科永供洒掃諸郡有自古得道升仙之處雖先令醮祭猶慮未周每處度道士二人其靈跡殊尤功應遠大者度三人永修香火其茅山紫陽觀取側近百戶太平崇元二觀各一百戶並蠲免租稅差科長充修葺洒掃應天下靈山仙迹並宜禁斷樵採弋獵如聞山林學道之士每被搜括且法之防邪本有所以至於宿處妖訛亡命聚衆誘陷愚人故令禁斷郡縣遂一槩迫逐使至道之士不得安居自今已後審之清潔更不得恐動

以廢修行

十二月戊戌聖神玄元皇帝降見於華清宮之朝元閣
乃改為降聖閣改會昌縣為昭應縣會昌山為昭應山
封山神為玄德公仍立祠宇以時祭享

八載六月玉芝產於大同殿先是太白山人李渾稱於
金星洞仙人見語老君云有玉板石記符聖上長生久
視令御史中丞王鉷入山洞求而得之制曰握乾圖者
必稟於元命宗道本者允屬於強名是知順物承天諒

通昭感之德報功尊祖貴叶崇高之義朕祇荷丕業恭
臨大寶何嘗不宵衣滌慮菲食齋心奉玄聖之垂範為
蒼生以祈福自頃昊穹眷命至道降休玉芝再產真容
屢見嘉應薦來罔知攸答豈謂玄記陰隲秘牒混成懸
徵造化之源密紀靈仙之洞慶崇冥錄昭錫朕躬初驗
神傳竟彰天授幽深異吐既殊於人代樸略其象固絕
於名言緬覲皇圖欽承道寶微旨有屬寅畏增深思申
嚴敬之誠以崇久大之業謹上玄元皇帝號曰聖祖大

道玄元皇帝仍以來月五日朕親奉冊禮

閏六月丙寅帝親謁太清宮上聖祖玄元皇帝尊號為
聖祖大道玄元皇帝丙辰詔玄宗妙本實備微言垂範
傳學將弘治化朕所以發求道之使遠令搜訪因聽政
之餘親加尋閱既刊訛謬爰正簡編必在闡揚以敦勸
道今內出一切道經宜令崇玄館即繕寫分道送諸道
採訪使令管內諸郡轉寫其官本便留採訪郡一大觀
持誦聖人垂訓蓋先於道學者宗本必有其師文宣王

與聖祖同時俱為教首雖考言比德理在難名而問禮
叙經迹彰親授恩廣在三之義用崇得一之尊宜於太
微宮聖祖前更立文宣王儀象與四真人列侍左右且
道降真符天有成命藏之於密則取固名山彰之以類
則發祥星洞况靈仙所集宜表殊休太白山可封為神
應山所繇四時祭祀其金星洞改為嘉祥洞所管華陽
縣仍一洞置一祠宇仙人臺下置一觀兩京并十道於
一大郡亦宜置一觀並以真符玉芝為名每觀度道士

七人修持香火戶部侍郎兼御史中丞王鉞以才受委以忠奉上頃命精求石記克協神心宜旌乃誠俾正章綬特與三品其李渾等三人旣親傳真誥因獲元符當有甄命用旌福應宜令中書門下量其所能具狀奏聞是日大赦制曰禘祫之禮以存序位質文之變蓋取隨時國家系本仙宗業承聖祖重熙累盛旣錫無疆之休合享登神思弘不易之典自今已後每禘祫並於太清宮聖祖前設位序正上以明陟配之禮欽若玄宗下以

盡虔恭之誠無違至道比來每緣禘祫時享則停事雖適於從宜禮或虧於必備已後每緣禘祫其常享以素饌三炷香以代三獻

十二月啓聖宮琢玉造聖祖大道玄元皇帝真容及帝真容

九載正月東京留守上言清河郡人崔以清今載元日平明於天津橋上忽見紫雲為蓋五色雲中前有音樂後有響梵其中有一人着黃衣乘青牛口云我是太上

李老君有天應云三玄在汝本望白馬河南紫微山上
得鼎處南一百五十步火急發取汝帝得之有同三光
有四句異言莫傳於人汝自見帝乃可得

二月甲戌吳郡太守林祥上言所部造真符玉芝觀於
李樹下發得聖祖尊容不勝大慶請宣付史館許之壬
寅華陰郡奏白鶴見於西岳五福峯甘露降大羅峯之
醮壇白鹿見於大羅東南峯駕鶴嶺衛叔卿之得仙處
請付史官從之

三月丁未詔曰宜於丹陽郡江寧縣簡擇形勝處創置
一觀度道士七人委太守精擇灼然有行道者具名錄
奏

十月太白山人王玄翼上言玄元皇帝降見言寶仙洞
中有妙寶真符詔刑部尚書王倕等獲之

十一月制曰自今已後每親告獻太微宮改為朝獻有
司行事為薦獻

十載正月有事於南郊於壇所大赦自今已後攝祭南

郊薦獻太清宮薦享太廟其太尉行事前一日於致齋具羽儀鹵簿公卿引入親受祝板乃還清齋所

四月帝於內道場親教諸道士步虛聲韻道士玄辨等謝曰臣自凡愚生逢大聖服膺真教庇影玄門謬得侍奉禁闈恭承侍問夙夜兢惕將何克堪伏見陛下親教步虛及諸聲讚以至明之獨覽斷歷代之傳疑定驕驥於海陸分景鏡於真偽平上去入則備體於正聲吟諷抑揚則宛仍於舊韻使詠之者審分明之旨聞之者無

譌舛之嫌妙協鈞天克諧仙唱伏以靈章本趣理固如
然但為流傳人間訛謬滋久非應道之主孰能正之是
可以振暢玄風發揮聖作臣忝趨仙禁預聽正聲欣戴
之誠倍萬常品特賜編諸史冊宣示中外帝曰一時之
事何足言焉所請者依

六月戊辰中書門下奏曰臣等昨於勤政樓下叙立恭
聞德音今日又道門威儀王虛真奉宣聖意伏承陛下
奉為五聖寫一切道德經五本於太清宮興唐東明龍

興觀各置一本仍各賜絹五百疋以申慶齋臣等伏以
至理本乎無為乃隱言以演教孝思存乎追遠必精意
以報親陛下欽崇道元虔奉先聖更抒睿思刊定真經
玉軸瓊輪旣懸之於日月玄宗奧旨方下濟於雲霄罔
極之情因心知至無疆之福有感必通式明孝經之誠
更闡上皇之化即知北極之字期悟俗於羣迷南薰之
風思躋人於壽域凡在士庶孰不歡欣臣等謬列台司
幸叨宮使感悅之極實萬常情無任忭躍之至望宣示

朝廷編諸史冊手詔報曰朕躬承丕業稟訓玄宗霜露
永懷感思罔極伏以三清設教五聖在天克奉先靈同
心薦福今玉版瓊章傳之洞府雲囊縹帙列在仙宗庶
以展永慕之心兼以播淳風之化編於簡冊實用愧焉
乙亥中書門下奏曰臣等今日因奏事伏承昨日辰時
大同殿前鐘樓上忽聞鐘聲其殿院常扃閉內更無人
即令檢覆其鐘樓門及殿院門皆閉須臾其鐘又鳴如
此者三度聞鐘聲響六十下其聲清徹特異人間左右

侍臣及女道士等皆聞伏以至順通微蘊虛無以為用
虔誠上達應精感以交符陛下端拱清穆欽崇道寶尊
玉皇之像未明而朝謁寫羣經之字乙夜而玄覽雖高
居於紫極常屬念於羣生故得契協希夷跡多靈異雖
仙樓未啓而神鐘自鳴不俟鯨魚之擊徹響於雲漢宛
同鸞鳳之音諧韻於金石實表羣仙效祉玄祖呈祥遍
圖牒而罕傳貫古今而未有臣等幸參近侍竊聽休徵
欣躍之誠實萬常品無任慶忭之至謹奉狀陳賀以聞

仍請宣示中外編諸史冊帝手詔曰朕齋心大同緬覲
真蹟豈精誠遠感而休應薦臻今九華之鐘三清徹響
聲聞金石氣含虛無是知紫宸之宮雲駢降集清童之
府烟景來遊將合律於雲璈表同和於陰則靈仙坐接
福壽昭然永惟嘉祥良深慶慰所請依

八月黔中郡上言紫極宮慶雲見蘄春郡上言天長觀
聖容玉石蓮座上產紫芝一本七莖

十三載二月親獻太清宮上聖祖玄元皇帝尊號曰大

聖祖高上大道金闕玄元天皇大帝又詔太清宮闕聖祖仙居頻告休徵屢貽啓迪不有優異豈表殊常其本宮道士宜各賜物三十段道門威儀王虛真賜物五十段陪位大德各賜物二十段

十四載四月道士王虛真卒贈洞微先生虛真東明觀道士以錄得見帝方崇玄言頗重之俾為道門威儀翰林供奉賜紫帔監領諸道士及卒帝甚悼之

十月御注道德經並義疏分示十道各令巡內傳寫以

付宮觀

十五載九月帝在蜀令道士於丈人廟修醮壇有虵見於廟前頭有兩角山上明燈自然明照

肅宗至德二年庚午通化郡上言玄元皇帝真容見十二月詔天柱山老君廟改為啓聖宮

乾元元年二月旱於曲江池投龍祈雨又令道士何智通於尚書省都堂醮土神用特牲設五十餘座右僕射裴冕及尚書侍郎官並就位如朝儀

四月丁未內出皇帝寫真圖自光順門送太清宮諸觀
道士都人皆以棚車幡花鼓樂迎送

二年十一月殿中監成國公李輔國奏大明宮三殿前
設河圖羅天大醮其夜及晨有龍見於御座褥宛轉鱗
甲脚迹遍於褥上以其褥示朝臣

上元二年七月癸巳於景龍觀設高座講論道釋二教
丁酉遣公卿百寮悉就觀設醮講論自宰臣以下賜錢
有差

九月詔曰國之大事郊祀為先貴其至誠不美名品黍稷雖設猶或非馨牲牢空多未為能享今以玄元孚祐至道為心將臻太和不欲多殺禮樂殊制孝敬同歸圓丘方澤任依常享薦宗廟祭祀但臨時獻熟用懷明德之馨庶合西隣之祭

代宗寶應二年七月壬寅羣臣上尊號壬子大赦改元制河南河北偽度僧尼道士女冠並與正度

大曆三年七月增置崇玄生員滿百員

七年二月光天觀道士檢校殿中監冲虛先生申甫上言請下制誡天下道士增修道法許之四月申甫又上言玄真觀開元觀望天觀並載先帝聖謚請至諱日各于其觀行香從之

八年正月乙未勅天下寺觀僧尼道士不滿七人者宜度滿七人三十以上者更度一七人二七以下者更度三人

九年四月丙戌肅宗忌日度尼僧道士凡二百餘人

十一月潤州上元縣石頭城新置大厯太乙之觀選道士七人住持

十二年十二月詔天下仙洞靈跡之處禁樵蘇

十三年乙巳新作乾元觀置道士四十九人以追遠祈福上資肅宗也其地在皇城南長興里本涇原節度使馬璘之宅璘初創建是宅重價募天下巧工營繕屋宇宏麗冠絕當時璘將卒抗表獻之帝方軫懷罔極欽崇道福以其當皇城形勝之地墻宇新潔遂命為觀加乾

元名馬先皇尊號也仍遣道門威儀申甫司其事

德宗貞元五年三月詔曰釋道二教福利羣生館宇經行必資嚴潔自今州府寺觀不得俗客居住屋宇破壞各隨事修葺

憲宗元和二年正月己酉朔親薦獻于太清宮

八年七月命中尉彭忠獻帥徒三百人修興唐觀賜錢十萬使壯其舊制其觀北距禁城因是開複道為行幸之所又以内庫絹千疋茶千斤為興唐觀城複道夫役

之賜又以莊宅錢五十萬雜穀千石充修道教之費

九年二月內出道教神仙圖像經法九舉以賜興唐觀
穆宗長慶三年十二月以內庫錢一百貫賜太清宮道
士人一千

敬宗寶曆元年七月命左僕射平章事李逢吉攝太尉
充孟秋薦獻大聖祖于太清宮

八月癸丑幸蓬萊殿會沙門道士共四百人賜食兼給
茶絹有差已巳以道士劉從政為檢校光祿少卿賜紫

并號昇玄先生

十月命中書侍郎平章事李程攝太尉充孟冬薦獻大
聖祖于太清宮

十二月命中書侍郎平章事竇易直攝太尉充季冬奏
祥瑞于太清宮

二年三月戊辰命興唐觀道士孫準入翰林

五月賜浙江送到絕粒女道士施子微紫衣一襲絹六
百疋銀器二百事命中使却送歸本州帝前後累訪貞

隱唯子微粗有修養之術故其去也獲厚賜焉癸未命
內宮張士清押領光順門進狀山人杜景先赴淮南浙
西江東湖南嶺南等道訪求藥術之士仍送景先衣一
襲絹三十疋甲午賜興唐觀錢二萬貫充道士劉從政
脩院

九月庚午命兩街供奉道士趙嘗盈等四十人於三清
殿修羅天大醮道場

十月丙寅以太清宮道士趙歸真充兩街道門都教授

博士

文宗太和七年八月戊子詔曰聖人立極教本奉先王者配天義惟尊祖我太祖玄元皇帝肇開寶運垂祚有唐致六合於大同躋羣生於壽域保茲鴻業實賴貽謀如聞亳州太清宮頻經水潦頗以摧毀永惟誕聖之地敢忘崇本之誠宜令宣武軍節度使李程兼充亳州太清宮使仍委漸加修葺以時致敬稱朕意焉

開成二年正月召麻姑山女道士龐德祖自錄臺門留

止玉晨觀

武宗以開成五年正月即位二月勅三月十五日玄元皇帝降生日宜為降聖節休假三日

會昌六年中書門下奏東都太微宮初成玄元皇帝玉聖容玄宗肅宗皇帝玉真容已令移就位請差右散騎常侍裴泰章充使陳薦維新之意

哀帝天祐二年四月太清宮使柳璨奏修上清宮畢請改為太清宮從之詔曰玄元皇帝肇基聖緒敷祐神孫

璿派靈長共乾坤而莫極瑤圖貞固與日月而無窮是
以我朝追崇奕葉昭祀禮因尊祖爰陳恭敬之文事匪
求真且異虛無之旨比者嘗如九廟別置一宮東遷以
來欲修奉而未暇北觀之內遂薦享以從宜每備粢盛
靡稽故實祝史正辭而追遠雖屬猶龍宰臣肅拜于當
陽如求罔象徒陳玉笋莫對瓊儀璨練達舊童振舉重
職爰思改作頗謂協宜庶不愆而不忘致來格而來享
又尋玄圃如得瀨鄉古殿密清喬木蔭翳可以仰規紫

府便號清宮捨短從長斯為智士尋源正始實賴賢臣
合議允俞殊可嘉獎

十月司天臺奏星文變見請於太清宮建黃籙道場從
之

三年六月辛卯太微宮使柳璨奏前使裴樞充宮使日
權奏請玄元觀改為太清觀又別奏在京弘道觀改為
太清宮至今未有制置伏以今年十月九日陛下親事
郊禮先謁聖祖廟弘道觀既未修葺玄元觀又在北山

若車駕出城禮非便穩今欲只留北邙山老君廟一所
其玄元觀請折入都城於清化坊內建置太微宮則車
駕行事得禮從之

後唐莊宗同光三年五月帝出師北門請雨於聖祖玄
元廟

明宗天成二年八月左補闕趙明吉上言曰竊見天下
宮觀久失崇修蓋自朱溫篡逆以來例多毀廢請下諸
道應本朝舊置宮觀近經毀折者皆勒修增以奉祖宗

以弘孝治光陛下中興之業顯國家大道之源復我真宗貞茲永世其兩京宮觀有公田乞免科索俾充齋糧以給正名道士庶懇志熱修香火期上玄之福祐

九月宗政卿李寶上言四方凡有玄元皇帝宮殿處請依修飾從之

三年正月中書奏假寧令二月十五日玄元皇帝降聖節休假三日準會昌元年二月勅休假一日伏請准近勅從之

四年十二月壬子勅尊崇聖祖修飾道宮既復其名固難無額宜令所司依舊造上清宮牌額懸掛兼京城內金真觀仍改名崇道觀亦准上給換牌額以老君廟久無牌額故也

長興四年七月帝違和小康召道士二十人於中興殿為金籙醮七日而罷

末帝清泰元年七月詔河中修五老觀

晉高祖天福四年五月庚辰廢華清觀為靈泉觀

九月辛卯召道士崇真大師張薦明錫以繒帛薦明燕人也少為儒遊學河朔漁獵莊老故性與道俱其後雲衣星冠奉自然之教帝素尚玄元御極之初數數召見帝問道可以治世乎薦明對曰道也者妙萬物而為言摠兩儀而稱德得之上者為道得之中者為仁義得之外者為禮智信外而失之非人也得其極者尸居衽席之間以治天下豈止乎世者也帝遂延入內殿講老子道德經召宰臣馮道授卷而聽道曰道士講老子僧

人受戒令文有之不可輕也帝遂禮之為師益加崇重
嘗聞宮中奏時鼓乃曰陛下聞鼓聲乎守一而已夫絃
匏金石其聲十二其黃鍾也唯合於黃鍾其不應者五
十有九出乎多門也鼓之為音也奚其間然無宮商無
角徵無羽無變和而契之其一故也人能混成於心則
天地俱矣何患世之不淳哉帝繇是虛心致靜尊道貴
德故每一召見多所頒賜

五年十一月賜張薦明號通玄先生令以道德二經雕

上印板命學士和凝別撰新序冠于卷首俾頒行天下
漢隱帝乾祐三年右補闕蘇德潛上言臣聞道以至真
為本自然為宗若不離嗜慾之源則安奏虛無之理况
兩京道宮是國家崇福之地竊見道場所設齋醮無非
蠲潔淨筵蓋表其精虔也訪聞道士皆有妻孥攜在道
宮居止不獨傷於教法其實汙於清虛望特行禁止勅
宜令御史臺嚴加告諭不得更然

周世宗顯德三年十一月命送華州道士陳搏復歸本

州帝好黃白術有人以搏名奏者命華州送至闕下館于內庭居月餘凡所咨詢靡聞於外內放還所止仍令本州以時存省

五年六月內出御衣六百餘事錢四十萬羅縠百疋分賜兩街僧道令增修寺觀

六年二月幸太清觀觀所賜鐘焉先是於乾明門外新修太清觀既成帝聞濮州有一鐘其聲甚振每擊之聞數十里乃命徙之以賜是觀至是故往觀焉

冊府元龜卷五十四

欽定四庫全書

冊府元龜卷五十五

宋 王欽若等 撰

帝王部

養老

禮曰年之貴乎天下久矣故有虞氏養老以燕禮夏后氏以饗禮商人以食禮周人脩而兼用之必以八月諸物老成順其時氣以助養育天子袒而割牲侯王設醬公卿饌珍所以老窮不遺彊不犯弱衆不暴寡明長幼

之序興揖讓之風習鄉上齒之義備矣降及後世巡省風俗則先問高年時臨舊都乃宴衍故老或賜飲於端闕或迴輿於私室而又因靈休之集畢嘉祀之禮則錫以鳩杖賁之束帛登板授之職開石窳之封此皆介于景福終之以仁斯教化之大本盛王之令典也流於惇史豈不美歟

帝舜養國老於上庠養庶老於下庠

夏后氏養國老於東序養庶老於西序

殷湯養國老於右學養庶老於左學

周文王為西伯制其田里教之樹畜導其妻子使養其老五十非帛不煖七十非肉不飽不煖不飽謂之凍餒文王之民無凍餒之老者此之謂也

漢文帝元年三月詔曰老者非帛不煖非肉不飽今歲首不時使人存問老幼

存省視也

又無布帛酒肉之賜將何

以使天下子孫孝養其親今聞吏稟當受粥者或以陳

粟

稟給也粥淖糜也給米使為糜粥也陳久舊也小雅甫田之詩曰我取其陳

豈稱養老之

意哉具為令

使其備為條制

有司請令縣道

或縣或道皆用此制也有蠻夷曰道

年八十以上賜米人月一石肉二十斤酒五斛其九十

以上人賜帛二疋絮三斤

絮綿也

賜物及當稟粥米者長

吏閱視丞若尉致

長吏縣之令長也若者豫及之詞致者送至也或丞或尉自致之也

不

滿九十嗇夫令史致二千石遣都吏循行

都吏今督郵是也

不

稱者督之

循行有不如詔旨者二千石察視責罰之

刑者及罪有耐以上不

用此令

一歲為罰作二歲刑以上為耐之能任其罪也又曰刑為先被刑也有罪在吏未決者言八十

九十之人雖合加賜其中有被刑罪者不在此賜物令條中也

武帝建元元年二月赦天下民年八十復二等九十復

甲卒

二等復二口之等也復甲卒不預革車之賦也

四月詔曰古之立教鄉里以齒朝廷以爵扶世道民莫善於德然即於鄉里先耆艾奉高年古之道也今天下孝子順孫願自竭盡以承其親外迫公事內乏資財是

以孝心闕焉朕甚哀之民年九十以上以有受粥法

給米

粟以為為復子若孫令得身帥妻妾遂其供養之事

若者

豫及之詞也有子即復子無子即復孫也遂申也

元狩元年四月赦天下賜民年九十以上帛人二疋絮
三斤八十以上米人三石

元封元年登封太山還詔行所巡至七十以上帛人二
疋

宣帝地節三年三月詔賜高年帛

元康元年三月以鳳凰集泰山賜三老帛

二年三月以鳳凰甘露降集賜天下高年帛

三年春以神爵集泰山賜天下高年帛

四年三月詔以廼者神爵嘉祥賜三老帛人各二疋

神爵元年三月祠后土賜天下高年帛

四年二月詔以廼者鳳凰甘露降及神爵集賜天下高年帛

五鳳二年三月鸞鳳集賜高年帛

甘露二年正月赦天下賜高年帛

三年詔以廼者鳳凰集新蔡賜新蔡三老帛

元帝初元元年四月賜三老帛

四年祠后土赦汾陽賜高年帛

五年四月賜三老帛人五疋

永光元年正月郊泰畤賜雲陽高年帛

三月赦天下賜高年帛

二年二月赦天下賜天下三老帛

建昭五年二月賜三老帛

成帝建始元年賜三老錢帛

鴻嘉元年二月賜天下高年帛

永始四年正月行幸甘泉賜高年帛

哀帝以綏和二年四月即位赦天下賜三老帛

平帝元始元年詔天下吏比二千石已上年老致仕者
參分故祿以一與之終其身

四年二月大赦賜天下高年帛

後漢明帝永平二年十月壬子幸辟雍初行養老之禮

詔曰光武皇帝建三朝之禮而未及臨饗

三朝謂明堂
辟雍靈臺也

眇眇小子屬當聖業

眇眇猶
微微也

間暮春吉辰初行大射今

月元日復踐辟雍尊事三老兄事五更安車輶輪供綏

執授侯王設醬公卿饌珍朕親袒割執爵而漱

字本作酉從盾

與太祖廟諱下字音同

祝哽在前祝噎在後

老人食多哽咽故置人於前後祝之令其

不哽噎也

升歌鹿鳴下管新宮八佾具儀萬舞於庭朕固薄

德何以克當易陳負乘詩刺彼己永念慙疚無忘厥心

三老李躬年耆學明五更桓榮授朕尚書詩曰無德不

報無言不酬其賜榮爵關內侯食邑五千戶三老五更

皆以二千石祿養終厥身其賜天下三老酒人一石肉

四十斤有司其存耆耄卹幼孤惠鰥寡稱朕意焉

三年二月立皇太子賜三老爵三級

八年十月臨辟雍養三老五更

十二年五月賜天下三老爵人三級

十七年五月賜天下三老爵人三級

章帝建初二年冬行饗禮以故司空伏恭為三老侍中

騎都尉周澤為五更

三年立皇后賜三老爵人三級

四年四月立皇太子賜三老爵人三級

七年九月幸鄴賜三老錢

元和二年二月耕於定陶詔曰三老尊年也其賜帛人一疋五月詔賜天下高年爵三級

章和元年七月詔曰秋令是月養衰老授几杖行糜粥飲食

月令中秋之令

其賜高年二人共布帛各一疋以為醴酪

和帝永元三年十月幸長安詔賜行所過三老錢帛

四年八月賜三老爵人三級

十二年三月賜三老爵人三級

十五年九月南巡賜所過三老官屬及民百年者錢帛
元興元年十二月賜天下三老爵人三級

安帝永初三年正月加元服賜三老爵人二級

元初四年七月詔曰月令仲秋養衰老授几杖行糜粥
方今案比之時郡縣不奉行雖有糜粥糠粃相半長吏
怠事莫有躬親甚違詔書養老之意其務崇仁恕賑護
寡獨稱朕意焉

延光元年三月改元赦賜三老爵二級

李充為左中郎將年八十以為國三老帝常特進見賜以几杖

順帝永建元年正月大赦賜三老爵三級

四年帝加元服賜三老爵人二級

陽嘉元年正月立皇后賜三老爵人三級

三年五月大赦賜民間年八十以上米一斛肉二十斤酒五斗九十以上加賜帛人二疋絮三斤

桓帝建和元年正月大赦賜三老爵三級

二年正月甲子加元服大赦年八十以上米酒肉九十
以上加帛二疋綿三斤

永興二年十一月校獵賜所過道傍年九十以上錢各
有差

靈帝光和元年冬行辟雍禮以光祿大夫楊賜為三老
魏文帝黃初中蘇林為博士給事中帝作典論所稱蘇
林者是也以老歸第國家每遣人就問之數加賜遺年

八十餘卒

高貴鄉公甘露三年八月詔曰夫養老興教三代所以樹風化垂不朽也必有三老五更以崇至敬乞言納誨著在博史然後六合承流下觀而化宜妙簡德行以充其選關內侯王祥履仁秉義雅志淳固關內侯鄭小同溫恭孝友帥禮不忒其以祥為三老小同為五更車駕

親率羣司躬行古禮焉

漢晉春秋曰帝乞言於祥祥對曰昔者明王禮樂既備化之以

忠誠忠誠之發形於言行夫大人者言行動乎天地天且弗違况於人乎臣欽若等曰按晉書志二年行養老

禮

晉惠帝永平元年五月賜高年帛人三疋

永興元年三月大赦賜高年帛三疋

明帝太寧三年閏二月即位賜孤老帛人二疋

成帝咸和元年二月大赦改元賜孤老米人二斛

孝武太元五年六月賜孤老不能自存者米人五斛

後魏太武時居地侯羅結年百七歲為長秋卿後年一

百一十詔聽歸老賜大窰東川以為居業并築城即號

曰羅侯城朝廷每有大事騎馬詢訪焉

文成和平二年三月幸中山至於鄴遂幸信都輿駕所
過皆親封高年問民疾苦民年八十以上一子不從役
四年三月賜京師民年七十以上太官厨食以終其年
孝文延興三年十一月賜高年布帛

太和元年十月詔七十以上一子不從役又宴京邑耆
老於太華殿賜以衣服

三年五月詔曰昔四代養老問道乞言朕雖冲昧每尚

其美今賜國老各衣一襲綿五斤絹布各五疋

四年七月改作東明觀詔會京師耆老賜錦綵衣服几杖稻米蜜麵復家人不徭役

六年三月幸武州山石窟寺賜貧老者衣服

十五年八月議養老

十六年二月賜京邑老人鳩杖八月司徒尉元以老遜位以元為三老以前鴻臚卿游明根為五更詔曰夫大道凝虛至德冲挹故后王法玄猷以御世聖人崇謙光

而隆美是以天子父事三老兄事五更所以明孝悌於萬國垂教本於天下自非道高識博孰能處之是以五帝憲德三王乞言若求備一人同之古哲叔世之老孰能克堪師上聖則難為其舉傳中庸則易為其選朕既虛寡德謝曩哲老更之選差可有之前司徒山陽郡公尉元前大鴻臚卿新太伯游明根並元亨利貞明允誠素少著英風老敷雅迹位顯台宿終歸私第可謂知始知卒希世之賢也公以八十之年宜處三老之重卿以

七十之齡可充五更之選於是養三老五更於明堂國
老庶老於階下帝再拜三老親袒割牲執爵而饋於五
更行肅拜之禮賜國老庶老衣服有差既而元言曰自
天地分判五行施則人之所崇莫重於孝順然五孝六
順天地之所先願陛下重之以化四方臣既年衰不究
遠趣心耳所及敢不盡誠帝曰孝順之道天地之經今
承三老明言銘之於懷明根言曰夫至孝通靈至順感
幽孝順之道無所不格願陛下念之以濟黎庶臣年志

朽弊識見昧然在心之慮不敢不盡帝曰五更助三老
以言至範敷展德音當克已復禮以遵所授禮畢乃賜
步輦一乘詔曰夫尊老尚更列聖同致欽年敬德綿哲
齊軌朕雖道謝玄風識昧睿則然仰稟先誨全遵猷旨
故推老以德立更以元父焉斯彰兄焉斯顯矣前司徒
公元前鴻臚卿明根並以克德懸車懿量歸老故尊公
以三事更以五雖老更非官耄耄罔祿然稟事既高宜
加殊養三老可給上公之祿五更可食元卿之俸供養

之味亦同其列其後車駕幸鄴明根朝於行宮詔曰游
五更養素蓬簷歸終衡里可謂朝之碩德國之老成可
賜帛五百疋穀五百斛勅大官備送珍羞後車駕幸鄴
又朝行宮賜穀帛如前為造甲第國有大事常璽書訪
之舊疹發動手詔問疾太醫送藥時奚護為外都大官
詔以護年邁既未致仕令依舊養老之例

十七年八月帝南伐至泗州民年七十以上賜爵一級
九月濟河詔雒懷并泗所過四州之民百年以上假縣

令九十以上賜爵三級八十以上賜爵二級七十以上賜爵一級

十八年正月帝南巡詔相兗豫三州百年以上假縣令九十以上賜爵二級七十以上賜爵一級孤老不能自存者賜粟五石帛二疋

八月丙寅詔六鎮及禦夷城人年八十以上而無子孫兄弟終身給其廩粟七十以上家貧者各賜粟十斛

十一月辛未詔冀定二州民百年以上假以縣令九十

以上賜爵三級八十以上賜爵二級七十以上賜爵一級

十二月丁卯詔郢豫二州之民百齡以上假縣令九十以上賜爵三級八十以上賜爵二級七十以上賜爵一級鰥老不能自存賜以穀帛

十九年四月幸彭城賜百歲以上假縣令九十以上賜爵三級八十以上賜爵二級七十以上賜爵一級老疾不能自存者賜穀帛

六月帝自伐齊迴車駕所經百年以上賜假縣令九十
以上賜爵三級八十以上賜爵二級七十以上賜爵一
級孤老不能自存者賜以穀帛

十月曲赦相州民百年以上假郡守九十以上假縣令
八十以上賜爵三級七十以上賜爵二級孤老不能自
存者賜以穀帛

二十年二月詔畿內七十以上暮春赴京師將行養老
之禮

三月宴羣臣及國老庶老於華林園詔曰國老黃耆以上假中散大夫郡守耆年以上假給事中縣令庶老直假郡縣名賜鳩杖衣裳

二十一年二月詔并州士人年六十以上假以郡守

三月詔汾州民百年以上假縣令九十以上賜爵三級八十以上賜爵二級七十以上賜爵一級

五月泛渭入河詔雍州士人百年以上假華郡太守九十以上假荒郡八十以上假華縣七十以上假荒縣庶

老以年各減一等七十以上賜爵三級時裴安祖為河東州主管後閒居養志不出城邑帝幸長安至河東存訪故老安祖朝於蒲坂帝與語甚悅仍拜安邑令安祖以老病固辭詔給一時俸以供湯藥焉

宣武景明三年八月以前大傅平陽公丕為三老

孝明熙平二年四月詔京尹所統百年以上賜大郡板九十以上賜小郡板

神龜元年正月詔京畿百年以上給大郡板九十以上

給小郡板八十以上給大縣板七十以上給小縣板諸
州百姓百歲以上給小郡板九十以上給上縣板八十
以上給中縣板

正光四年七月詔曰達尊斯在齒預一焉崇敬黃耆先
代通訓故方叔以元老處位充國緣自強見留雖七十
致仕明乎典故然以德尚壯許其繫維今庶寮之中或
年迫懸車循禮宜退但少收其力老棄其身言念勲舊
眷然未忍或戴白在朝未嘗外任或停私歷紀甫授考

級如此之徒雖滿七十聽其蒞民以終常限或新解縣吏或外任私停已滿七十方求更叙者吏部可依令聞奏其有高名峻德老成髦士灼然顯達為時所知者不拘斯例若才非秀異見在朝官依令合解者可給本官半祿以終其身使辭朝之叟不恨歸於閭巷矣

孝莊建義元年五月詔上黨百年以下九十以上三板三品郡八十以上四品郡七十以上五品郡

後周明帝武成二年六月己巳板授高年刺史守令各

有差

武帝保定元年正月甲戌詔先經有職官年六十以上及民年七十以上節級板授官

三年四月幸太學以太傅燕國公于謹為三老以食之三老入門帝迎拜門屏之間三老答拜有司設三老席於中楹南向大師晉公護升陞設几於席三老升席南面憑几而坐以師道自居大司寇楚公寧升陞正烏帝升立於斧扆之間西面有司進饌帝跪設醬豆親袒割

三老食訖帝又親跪受爵以漱有司撤訖帝北面立訪道三老乃起立於帝後帝曰猥當天下重任自惟不才不知正治之要公其誨之三老答曰木受繩則正后從諫則聖自古明王聖主皆虛心納諫以知得失天下乃安惟陛下念之又曰為國之本在乎忠信是以古人云去食去兵信不可失國家興廢莫不繇之願陛下守而勿失又曰治國之道必須有法法者國之綱紀綱紀不可不正正之道在於賞罰而已若有功不賞有罪不

罰則天下善惡不分人無所措手足矣三老言畢帝再拜受答拜焉禮成而出

七月丁丑幸津門問百年賜錢帛又賜板授有差

建德二年詔曰尊年尚齒列代弘規序舊酌勞哲王明
範朕嗣承洪業君臨萬邦驅彼兆庶寘諸仁壽軍民之
間年多耆耄眷言衰暮宜有優崇可頒受老職使榮沾
邑里

宣帝時柱國閻慶於武帝朝抗表致仕慶既衰老常嬰

沉痾帝以其先朝耆舊特異常倫乃詔靜帝至第問疾
賜布帛千段醫藥所須令有司供給大象二年拜上柱
國

隋文帝踐極令皇太子就周致仕柱國閻慶第問疾仍
供醫藥之費

煬帝大業五年二月丙辰宴耆舊四百人於武德殿頒
賜各有差

十月癸亥詔曰優德尚齒載之典訓尊事乞言義彰昭

序鬻熊為乘取非筋力方叔元老克壯其猷朕永言稽古用求至治是以龐眉黃髮更令收序務簡優秩無虧藥膳庶其卧治佇其弘益今歲耆老赴集者可於近郡處置年七十以上疾患沉滯不堪居職即給賜帛送還本郡其官至七品以上者量給祿廩以終厥身

六年四月帝在江都宮宴江淮以南父老頒賜有差七年二月詔曰今往涿郡巡撫民俗其河北諸郡及山西山北年九十以上者板授太守八十者授縣令

唐高祖武德三年幸稷州召父老置酒高會賜帛

五年三月宴京城父老賜帛

太宗貞觀三年四月詔高年八十以上粟二石九十以
上三石百歲加絹二疋

十月幸隴州詔岐隴二州八十以上賜物百歲以上尤
加優恤

五年十二月幸溫湯新豐賜高年帛

六年三月幸九成宮八十以上賜粟帛

五月宴岐州父老賜帛

九月幸慶善宮賜故老帛

十一年正月宴長安父老於玄武門賜以穀帛

三月幸洛陽宮宴父老於乾元殿賜以粟帛

是年車駕在雒陽幸甄權宅禮高年也權潁州人精曉
藥術為天下之最時年一百三歲拜朝散大夫賜以粟
帛被褥几杖因詔百歲以上者給侍五人

十二年二月宴雒陽父老賜帛有差

十三年正月朝於獻陵三原縣人年八十以上賜物有差

十四年正月幸魏王宅賜同里老人物有差

十五年正月如雒陽所過州賜高年穀帛

五月并州父老請臨幸帝賜宴於武成殿仍賜物遣之
十一月蒐於伊闕詔所經之縣遣使存問高年賜帛各有差

十七年六月并州父老詣闕賀皇太子䟽爵晉藩賜宴

及物以遣之

十一月以貞石表瑞制男子年七十以上量給酒米
十八年正月癸卯將以征高麗宴雍州父老百歲以上
羶被袍各一帛十疋粟十石九十以上物五段粟五石
八十以上物三段粟一石

十一月壬申至雒州遣使齎璽書詣鄭汝懷澤四州問
高年宴賜各有差壬午宴雒州父老一百九十人於儀
鸞殿班賜有差

十九年二月發雒陽征遼所經州縣高年賜粟帛幸行
次河陽女子呂年百歲太宗幸其宅存問之賜氈帛袍
各一綿帛十段次汲縣女子翟張並年百歲太宗幸其
宅存問之賜物如河陽

三月次平棘張道鴻之廬賜以衣服道鴻性鄙野無他
事行少時嘗遊名山得服食之訣居人間每餌金膏時
年百四十六歲

十月次營州名父老年七十以上賜繒帛綾錦等

二十年幸并州引太原父老宴之賜物有差

二月發并州賜所過高年粟有差

七月幸靈州賜高年粟帛有差

八月丁卯見京城父老於北闕賜食及粟帛

二十二年三月至玉華宮賜所過高年粟帛

二十三年五月以甘雨賜天下八十以上粟帛

高宗永徽六年十月立武氏為皇后赦天下八十以上老人各賜粟二石帛三段百歲以上各賜粟五石帛十

段

顯慶元年正月辛未立皇太子赦諸年八十以上各賜粟帛已卯宴京城老人八十以上賜物各有差

二年二月辛酉陽父老百歲以上賜氈被一具袍一領絲絹十段粟二十石仍遣使就家存問九十以上各賜絲絹五段十月辛酉鄭州賜八十以上老人粟帛有差

閏十二月以駕幸東都詔所經處八十以上老人賜氈袍綿及粟有差

五年三月幸并州老人年八十以上板授刺史縣令并
賜氈被粟帛各有差

龍朔元年九月駕幸河南縣婦人張氏年一百三歲遂
賜絹三十疋氈被一具皇后太子亦親問賜以衣物及
繒綵

乾封元年正月改元詔諸老人八十以上者假授刺史
司馬量賜粟帛

總章二年九月幸岐州賜高年衣服粟帛

咸亨元年十一月將幸東都宴京城父老有不能行者仍許子弟扶至殿庭仍節級賜物及黃帔而遣之

上元三年三月自汝州溫陽還賜八十以上老人帛

弘道元年二月大赦天下老人百歲以上者板授下州刺史婦人板授郡君九十以上者板授上州司馬婦人板授縣君八十以上者板授縣令婦人量賜粟帛

睿宗太極元年正月藉田大赦賜老人年九十以上板授下州刺史緋衫牙笏八十以上板授上州司馬綠衫

木笏

玄宗開元二年九月引京師侍老宴於含元殿庭詔曰
古之為政先於尚老居則致養禮傳三代行則就見制
問百年蓋皇王之勸人教黎庶之為子朕寅奉休厯祇
膺聖謨因秋歸而歲成屬星見於郊祀念其將至尤重
乞言俾伸恩於几杖期布惠於鄉國九十以上宜賜几
杖八十以上宜賜鳩杖所司準式天下諸州侍老宜令
州縣遂穩便設酒食一准京城賜几杖其婦人則送几

杖於其家

三年十月詔古者親問百年義在養老其侍年老九十以上并篤疾各賜物四段綿帛各一疋

十一年正月車駕幸北都詔太原府父老八十以上賜物五段板授上縣令賜緋婦人板授上縣君九十以上賜物七段板授上州長史賜緋婦人板授郡君百歲以上賜物十段板授上州刺史賜紫婦人板授郡君夫人十一月親祠南郊禮畢大赦詔百歲老人賜帛五段粟

五石縣令至其家存問給付

十三年十月東巡至濮州河南河北五百里內父老各賜帛二疋十一月封禪禮畢徐曹亳汴許仙豫等州父老各賜帛二疋十二月至東都京兆父老拜賀各賜帛以遣之

十五年詔曰吏部選人有衰老不堪釐務者優其資致仕量賜多少粟帛

十七年十一月詔諸州侍老百歲以上賜綿帛十段九

十以上賜五段八十以上賜三段

二十年十月祠后土畢詔天下侍老百歲以上賜粟五石八十以上三石

二十三年正月藉田禮畢詔天下侍老百歲以上板授上州刺史九十中州刺史八十上州司馬七十以上所繇量給酒肉各令存問

二十四年八月千秋節召京兆父老宴敕並宜坐食訖樂飲兼賜物

二十六年七月冊皇太子大赦詔天下侍老八十以上
賜粟三石帛三尺百歲以上賜粟五石綿帛五段並假
板授

二十七年二月加尊號大赦詔天下侍老百歲以上板
授下州刺史婦人板授郡君賜粟五石絹帛五段九十
以上板授州司馬婦人板授縣君粟三石絹帛三段八
十以上板授鄉君粟二石綿帛二段

天寶元年正月改元詔天下侍老八十以上者宜委縣

官每加存問仍量賜粟帛侍丁者令其養母孝假者矜其在喪此王政優容俾伸情理而官吏不依令式多雜後使自今已後更不得然

三載十二月祀九宮貴神禮畢詔天下侍老百歲以上賜綿帛五段粟三石八十以上三段粟二石

六載正月親祠南郊禮畢詔天下侍老百年以上賜綿帛五段粟三石八十以上綿帛三段粟二石仍令長官存問

七載五月加尊號詔京城父老各賜物十段七十以上板授本縣令其妻板授縣君六十以上板授本縣丞天下侍老百歲以上板授下郡太守婦人板授郡君九十以上板授上郡司馬婦人板授縣君八十以上板授縣令婦人板授鄉君仍賜酒麵

八載閏六月冊尊號禮畢詔高年給屬存養因時定式務廣仁恩其天下百姓丈夫七十五以上婦人七十以上宜各給一人充侍仍自簡擇至八十以上依常式處

分

十載正月親祠南郊禮畢詔天下侍老百歲以上賜綿帛五段粟五石八十以上綿帛三段粟三石丈夫七十
五以上婦人七十以上絹帛五段粟二石

十三載二月冊尊號禮畢詔天下侍老百歲以上板授
本郡太守婦人板授郡夫人各賜綿帛五段粟三石八
十以上板授本縣令婦人板授縣君各賜綿帛二段粟
二石

肅宗至德元年即位於靈武詔曰天下耆壽各賜物五段侍老板授太守縣令仍各賜物五段

二年十二月赦詔天下侍老八十以上板授有差並賜緋魚袋授太守縣令

上元二年赦詔天下侍老未板授者與板授

代宗廣德二年二月親祠南郊禮畢大赦詔天下侍老九十以上板授刺史七十以上板授上佐縣令

德宗興元元年六月發興元詔本府耆老與板授本縣

令仍賜緋

貞元五年四月以太子少傅兼禮部尚書蕭昕為工部尚書前太子少詹事韋建為秘書並致仕仍給半祿料後受致仕官者並宜准此舊例給半祿及賜帛其俸料悉絕帝念歸老之臣特命賜其半焉致仕官給半祿自昕等始也

順宗即位初大赦百姓九十以上板授及賜各有差仍令官吏就家存問

憲宗元和元年正月詔天下百姓高年賜米帛羊酒
十四年七月冊尊號大赦委中書門下選黜陟使分巡
天下百姓高年者頒賜有差

穆宗以元和十五年正月即位十一月令鄭覃往鎮州
宣慰其四州之內有高年不能自存者就給粟帛

長慶元年正月郊祀禮畢赦制天下百姓高年者賜粟
及綿絹有差

三月以盧龍軍節度使劉總歸詔管內高年不能自存

差官就問給賜粟帛

臣欽若等曰唐自武宗已後無實錄故事多闕

後唐莊宗同光元年四月即位制曰應諸道管內有高年踰百歲者便與給復永俾除名自八十至九十者與免一子免役州縣不得差徭

十月德音有年過八十者免一子從征

明宗天成二年十月辛丑詔曰敬老之規前王所重養親之道為子居先應有年八十以上及家長有廢疾者宜免一丁差役俾遂奉養

晉高祖天福二年四月丁亥制曰洪荒之內鄉黨之中
宜弘養老之規式表問年之道天下百姓有年八十以
上者與免一丁差徭仍令逐處簡署上佐官

六年八月帝幸鄴都制管內耆老八十以上者並與板
授上佐

周太祖廣順二年十一月左監門衛上將軍李建崇右
神武大將軍安仲左領軍將軍慕容業右領衛將軍劉
彥章各賜紫蔽正錦袍金塗銀束帶建崇等皆年七十

餘太祖以舊將累為刺史留後老居班列故有是賜仍
令每日內殿起居退就公食

冊府元龜卷五十五